

Biblia alang sa Kabataan motanyag

Si Daniel nga Bihag



Gisulat ni: Edward Hughes

Gihulagway ni: Jonathan Hay
Alastair Paterson

Gipahaom ni: Mary-Anne S.

Gihubad ni: Mel Lorell Abugho,
Cheryn Mabano Abugho

Gipagawas sa: Bible for Children
www.M1914.org

©2023 Bible for Children, Inc.

Pagtugot: Mahimo kang mokopya o mopatik niini
nga estorya, ayaw lang ibaligya.



Si Daniel ug ang iyang tulo ka higala nagpuyo sa Israel. Usa ka adlaw usa ka bantugan nga hari miadto sa ilang yutang natawhan ug gidala ang tanang maalamon nga mga batan-ong lalaki palayo sa iyang nasod. Ang hari adunay usa ka dako nga taas nga ngalan - Nabucodonosor - ug siya nagpuyo sa usa ka layo nga nasud nga gitawag ug Babilonya.



Gitratar pag-ayo ang mga batan-ong lalaki didto sa Babilonya. Gipili sa hari ang labing maalamon ug labing maayo nga mga batan-ong lalaki gikan sa matag nasud sa kalibutan. Nagplano siya sa pagbansay kanila sa pinulongan sa Babilonya aron sila mahimong iyang mga sulugoon ug makatabang kaniya sa pagdumala sa gingharian.



Ang pagkaon maayo usab. Ang mga batan-ong lalaki mikaon sa kung unsa sab ang gikaon sa hari. Apan si Daniel ug ang iyang mga higala dili gustong mokaon sa pagkaon tungod kay kini gipahinungod sa bakak nga mga diyos. Si Daniel misaad nga dili gayod siya mobuhat ug bisan unsa batok sa iyang Diyos. Ang Dios sa Israel nagmando sa Iyang katawhan nga dili makiglabet sa mga diyos-diyos o bakak nga mga diyos.



Gihangyo ni Daniel ang tawo nga nagdumala sa iyang pagbansay alang sa pagtugot nga dili mokaon sa pagkaon sa hari. Kon mahibal-an kini sa hari, masuko siya pag-ayo. Apan gihimo sa Diyos si Daniel nga paborito niining tawhana.



Misugot siya nga sulayan si Daniel ug ang iyang mga higala. Sa sulod sa napulo ka adlaw, utanon lang ang ilang kan-on ug tubig lang ang ilang imnon. Sa kataposan sa napulo ka adlaw si Daniel ug ang iyang mga higala tan-awon nga mas himsog kay sa tanang ubang batan-ong lalaki nga mikaon sa pagkaon sa hari. Busa gitugotan sila sa pagpadayon sa pagkaon sa mga utanon ug tubig.



Kining batan-ong mga lalaki nagpasidungog sa Diyos. Ug gipasidunggan sab sila sa Diyos. Ang Diyos naghatag kanila ug kahibalo ug kahanas sa mga butang nga ilang nakat-onan, ug si Daniel adunay kaalam sa pagsabut sa tanang mga panan-awon ug mga damgo.





Human sa tulo ka tuig nga pag-eskuyla sa Babilonya, ang tanang batan-ong mga lalaki gipresentar ngadto kang Hari Nabucodonosor. Iyang gipili si Daniel ug ang iyang tulo ka higala ingong labing maayo kanilang tanan. Sa pagkatinuod, ang Hari nakadiskobre nga si Daniel adunay labaw nga kaalam kay sa tanang maalamon nga mga tawo sa iyang gingharian.



Usa ka gabii, nagdamgo ang hari. Gipatawag niya ang iyang mga salamangkero, mga astrologo ug mga salamangkero sa pag-anhi ug pagbarog sa iyang atubangan. Ang hari miingon, "Ako nagdamgo ug usa ka damgo, ug ang akong espiritu nabalaka sa pagsabut sa damgo." Ug ang mga tawong manggialamon mingtubag, "Oh hari, mabuhi ka sa walay katapusan! Sultihi ang imung mga alagad sa imung damgo, ug kami mosulti usab kanimu sa buot ipasabot niini."



Ang hari mitubag, "Dili! Kinahanglan nga sultihan mo ako kung unsa ang akong damgo ug unsa ang kahulogan niini. Kung dili nimo buhaton, ikaw pagaputlon ug ang inyong mga balay masunog! Apan kon isulti ninyo kanako ang damgo ug ang kahulogan niini," ang ang hari nagpadayon, "makadawat kamu ug mga gasa ug mga ganti ug dakong dungog." Siyempre, walay usa sa maalamong mga tawo ang makasulti sa hari sa iyang damgo.



Ang maalamon nga mga tawo sa hari miingon sa hari,
"Walay usa ka tawo sa yuta nga makahimo sa imong
gipangayo. Ang mga dios lamang ang makahimo niana,
ug sila wala magpuyo sa yuta." Nasuko pag-ayo ang
hari. "Laglaga ang tanang maalamon nga
mga tawo sa Babilonya!" misugo siya.



Ug sa diha nga ang mga sundalo nangabut aron sa pagpangita kang Daniel, siya miingon kang Arioch, ang kapitan sa hari, "Nganong gilaglag man sa hari ang tanang mga tawong manggialamon?"

Unya gisuginlan ni Arioc si Daniel sa tanan nga nahitabo. Miadto si Daniel sa hari.


Nangayo siyag dugang panahon aron iyang masulti sa hari ang kahulogan sa iyang damgo.



Unya miadto si Daniel sa iyang balay, ug gisugilon niya ang tanan ngadto sa iyang mga higala nga si Sadrach, Mesach, ug Abednego. Si Daniel wala mahibalo kon unsa ang damgo o unsa ang kahulogan niini, apan siya nakahibalo nga naay usa ka Tawo nga nakahibalo sa tanan. Nga kanang usa ka tawo mao ang Diyos.



Busa, si Daniel ug ang iyang mga higala nag-ampo.



Gipakita sa Dios kang Daniel ang damgo ug ang kahulogan niini. Gidayeg ni Daniel ang Dios sa langit, nga nag-ingon, "Bulahan ang ngalan sa Dios hangtud sa kahangturan, kay Iyaha man ang kaalam ug kusog."



Si Daniel nagdali ngadto sa hari ug miingon kaniya,
"Adunay usa ka Dios sa langit nga nagpadayag sa mga
tinago." Gisultihan niya ang hari kon unsa ang iyang
gidamgo ug unsay kahulogan sa damgo.



Sa pagkadungog ni Hari Nabucodonosor sa damgo ug sa kahulogan niini, mihapa siya sa atubangan ni Daniel ug miingon, "Sa pagkatinuod ang imong Diyos mao ang Diyos sa mga diyos, ug ang Ginoo sa mga hari, ug ang tigpadayag sa mga tinago, sanglit ikaw makapadayag niining tinago!"



Unya gihimo sa hari si Daniel nga usa ka bantugang tawo, ug gihatagan siya ug daghang dagkung mga gasa. Gihimo niya syia nga manugdumala sa tibuok nga probinsya sa Babilonya, ug hepe sa tanan nga maalamon nga mga tawo sa Babilonya.



Si Daniel nga Bihag

Estorya gikan sa Pulong sa Dios, ang Biblia,

makita sa

Daniel 1-2

"Ang pag-abot sa Imong mga Pulong
nagahatag og kahayag." Salmo 119:130





Ang Kataposan

Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios:
Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab.

Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

